



SAOPĆENJE ZA JAVNOST

Iskorištavanje djece radi pornografije S. Djedović osuđen na godinu zatvora

(Brčko, 9.8.2024. godine)

Tužilaštvo Brčko distrikta BiH dokazalo je krivicu S. Djedovića (27), optuženog za iskorištavanje triju maloljetnica radi pornografije, usljed čega je pred Osnovnim sudom Brčko distrikta BiH osuđen na godinu zatvora.

Tužilaštvo Distrikta procesuiralo je Djedovića što je u periodu od avgusta 2015. godine do februara 2016. godine koristeći društvenu mrežu *Facebook*, sa svog korisničkog naloga, od maloljetnice rođene 2000. godine zahtijevao i na svoj profil dobio 14 fotografija na kojima su snimljeni goli intimni dijelovi njenog tijela. On je, zatim, takve fotografije ostavio memorisane na svom *facebook* profilu i istovremeno pohranio u memoriju svog računara. Isto tako je s drugog *facebook* naloga preuzeo i pohranio u računar sedam fotografija na kojima su snimljeni goli intimni dijelovi tijela druge maloljetnice, rođene, takođe, 2000. godine. Preuzevši s interneta i pet fotografija na kojima su snimljeni goli intimni dijelovi tijela maloljetnice rođene 2001. godine, on ih je pohranio na istoj lokaciji. Sve ih je tu čuvao svjestan da su žrtve, u vrijeme nastanka fotografija na kojima su prikazane, bile maloljetne i da se radi o zabranjenom pornografskom iskorištavanju djece.

Kao rezultat zajedničkih planskih aktivnosti Tužilaštva i Policije distrikta Brčko na suzbijanju, otkrivanju i sankcioniranju dječje pornografije, u decembru 2016. godine izvedena je operativna akcija kodnog naziva "*Haker*". Ubrzo je sprovedena sveobuhvatna proširena istraga, koja je okončana podizanjem optužnica protiv većeg broja osumnjičenih. Zbog posjedovanja velikog broja fotografija maloljetnih žrtava do kojih su dolazili putem različitih *facebook* naloga, traženjem fotografija od žrtava, ali i dijeljenjem i preuzimanjem s interneta, njima je stavljeno na teret krivično djelo Iskorištavanje djeteta ili maloljetnika radi pornografije (iz člana 208 stav 1 Krivičnog zakona Brčko distrikta BiH).

Postupajući po jednoj od podignutih optužnica iz 2018. godine, proizašloj iz ove istrage, Osnovni sud održao je glavni pretres tokom kojeg je Tužilaštvo dokazalo optužbe protiv četvorice optuženih. Sud je, stoga, donio osuđujuće presude, najprije protiv trojice učinilaca ovog krivičnog djela, izrekavši im uslovne osude s utvrđenim zatvorskim kaznama od tri, pet i osam mjeseci. Nedavno je jednog od optuženih oslobodio od optužbe, dok je na kraju prvooptuženog Djedovića osudio na kaznu zatvora od jedne godine. Kako je Apelacioni sud Distrikta odbio njegovu žalbu, presuda Djedoviću postala je pravosnažna, a kao i u ranijim osudama, ovom presudom naređeno je uništavanje zabranjenog pornografskog sadržaja.

GLAVNI TUŽILAC
ZEKERIJA MUJKANović